



Syt 70 Joor e Sujet-Waage – zem Jubi dien mer Waggis draage!

„Bis zletscht“ han y dänggt – yych wär so froo,
wurd dä Kelch an mir voriiber goo!
Denn syt 70 Joor - muess ych Eich saage,
duen ych scho an däm Zeedel gnaage.
Y main das zwoor mit eme Augeblinzle,
wenn y die Loobhudelei due aanebrinzle!

Als Sujet spiilt sich d Klosterräbe sälber,
mit Strau im Hirni und dumm wie Kälber.
Dasch nid zem Lache, maint em Obmaa si Frau
Das git e Jubi-Fasnachts-Waage mit Strau.
Mir geen als Jubeljoor-Waggis uff d Stross,
denn suscht isch bi de Klosterräbe nyt mee los!

Dr Grund isch dä, maint dr Munatius,
wo nummen ummestoot im roote Huus.
Well dr Källergaischt vom Galgehiigel,
sich uffreggt wägem e Glaiderbiigel,
wo glemmt, wenn är in syyner Gruft,
abhaue will wägem Mooderduft!

Är will bekanntlig immer schnäller,
dr Stainebürg ab in Klosterräbe-Käller,
won är syt 70 Joor - im hinderen Egge,
sich an dr Fasnacht duet verstegge.
Jetz hoggt er deerte mit ere Grippe,
und vom Fieber gläbbere syyni Rippe!

Dr Källergaischt hoggt dert au umme,
Wel är syt Joorzäänte numme,
aimol e Fasnacht uff em Waage,
vo dr Klosterräbe mecht erdraage
und mitfaare will, uff em Draggdoor,
als Waggis mit schwarz/wysse Hoor!

Äntlig wird em dä Wunsch erfüllt,
si Fasnachts-Seensucht die wird gstillt.
Vo wytem gseesch en in syyne Lumbbe,
uff em Draggdoor ummegumbbe
und mit de Gnoche hinder de Niere,
brobiert er sogar no z intrigiere!

Er bälutschiert und schreyt und lacht,
wel är e riisedolli Fasnacht macht,
denn au als Källergaischt kamen au
ummebriele, gaggere, halloo, hellau.
Es wird nur schwiirig, wenn em vo hinde,
wotsch e Blagedde an e Rippi binde!

Dr Källergaischt duet au studiere,
wien är sich ka bim Comité präsentiere
und dääne Möps erglääre, dasch au nid zem Lache,
är well in 100 Joor no Fasnacht mache!
Denn foot är mit dääne afoo ummedurne
mit alle vom Comité - vom Grab bis zer Urne!

Wo dr Källergaischt vor 70 Joor,
d Klosterräbe hinder em Dalbedoor,
grindet het als Guggen uff em e Waage,
het me z Basel gwisst - so nur zem saage -
ass d Klosterräbe Gift und Galle spritzt,
wenn si am Cortége duureflitzt!

Wägem Klimawandel gseesch sogar,
dr Källergaischt-Waggis in dr Rio-Bar,
won er mit em Obma-Ronny wie gsteert,
aifach Wyy und Bier dur d Rippi leert.
D Moral vo däm Zeedel - das isch jetz zem Lache:
D Klosterräbe dien als Waggis Fasnacht mache!

Scheeni Fasnacht!

Bsuech is au uff www.klosterraebe.ch

D Ladäärne-Uusstellig uff em Minschterplatz und D Waage- und
Reggwisyte-Uusstellig bi dr Kasäärne sin vom Määntig znacht
bis am Mittwuch demoorge. Deert und an de 3 Verkaufsständ
(CINS) in dr Stadt ka men au alli Zeedel und Schnitzelbängg, d
Blagette und d Rädäbängg kaufe.

D Zeedellääsete isch am Sunntig no dr Fasnacht 2019 am
17. Meerz vom Fimfi bis am Siibeni zoobe im Käller vo dr
Baseldytsche Biini (im Lohnho f 4). Dr Ytritt isch vergäabe.
D Foyer-Bar isch vom Vieri ewäg offe.